

KARABELO YA SA SARS DIPUONG TSE LAHLEHISANG TSE ENTSWENG KE MONG. LUCKY MONTANA SETJHABENG

Pretoria, 11 Mphalane 2025 — SARS e batla ho supa hore nakong eo taba ena ya Mong. Tshepo Lucky Montana e neng e qala ka yona e ne e se moemedi wa tsa dipolotiki, mme kahoo taba ena e keke ya nkelwa lepatlelong la tsa dipolotiki le ya ho ba letsholong la ho sotluwa ka sepolotiki.

Mong. Tshepo Lucky Montana (“Mr Montana”), setho sa Palamente, o hlasetse Ditshebeletso tsa Lekgetho tsa Afrika Borwa (“SARS”) phatlalatsa matatsing a ho feta ka tshebediso ya lesedinyana la ditaba la *Independent Online* (“IOL”).

Masedinyana a mang le ona a ile a pheta tsena tse bolelwang ka tsela e tshwanang le e sa fapaneng hakaalo. Leshano le buuwang ke Mong. Montana le tobile. Ho ya ka IOL, o boletse tse latelang:

1. Hore SARS “e sebedisitse matla a yona hampe”;
2. “Taolo e mpe” ka SARS;
3. Hore SARS e “letsholong la ho mo hlorisa ho latela tshekamelo ya hae ya sepolotiki”, le hore
4. SARS “e fetotse kahlolo ya lekgotla ka mokunyata ho tshehetsa dikoloto tse hodimo tsa lekgetho”

Ho ya ka IOL, Mong. Montana, ka lebaka la tsena tse boletsweng ka hodimo, “o hlahletse diqoso kgahlano le baemedi ba SARS tse mabapi le “boqhekanyetsi” mane Ditshebeletsong tsa Sepolesa sa Afrika Borwa (“SAPS”).

Ka la 8 Mphalane 2025, SARS e ile ya ikarabella ka puo ya bophatlalatsi ba ditaba ya kakaretso moo e neng e hanana le tsena tse leshano (sehlomathiso 1). SARS e ile ya tswela pele ho ntsha tsebiso e lebang ho Mong. Montana ho latela dintlha tsa karolo ya 67(5) ya Molao wa Taolo ya Lekgetho wa 28 wa 2011 (“Molao wa Taolo ya Lekgetho”).

Ho latela dintlha tsa karolo ya 67(5) ya Molao wa Taolo ya Lekgetho, SARS e na le matla a ho tsebahatsa lesedi la molefalekgetho phatlalatsa moo ho hlokehang e le ho lwantshana le dipolelo tsa leshano tse ka nnang tsa kgella fatshe tshepo ya setjhaba hodima mokgwatshebetso wa tsa lekgetho. Tsebiso ena e ne e neha Mong. Montana monyetla wa ho hula dipolelo tsena tsa hae le leshano nakong ya dihora tse 24. Mong, Montana o hlolehile ho etsa jwalo.

Jwalokaha ho hlokahala ho fihlela jwale, SARS e tla hlalosa tatelano ya dintlha, le ka ho qolleha ho bapa le mashano a builweng ke Mong. Montana.

Mashano a mabapi le "tshebediso e mpe ya matla", "taolo e mpe", le "letsholo la ho mo hlorisa ho latela tshekamelo ya hae ya sepolotiki".

Mong. Montana o entse dipolelo tse tshwanang le tsena mane Lekgotleng le Phahameng la Karolo ya Gauteng, Pretoria tabeng e pakeng tsa Montana le Khomishenara ya Ditshebeletso tsa Lekgetho tsa Afrika Borwa (2023-047735) [2025] ZAGPPHC 749. Mong. Montana o bile le monyetla wa ho fana ka bopaki ba dipolelo tsa hae empa a sitwa ho etsa jwalo. Kahlolo e mabapi le nyewe ena e hlakile (sehlomathiso 2).

Hara tse ding, lekgotla le dihile kahlolo e reng:

“Serapeng sa 28.5, Mong. Montana o qosa SARS ka taolo e mpe le tshebediso e mpe ya matla. Serapeng sa 29.4 le serapeng sa 42 o qosa SARS ka ho ba letsholong la ho mo hlorisa ka lebaka la tshekamelo ya hae ya sepolotiki... Dipolelo tsena tsohle di lokela ho tshwelwa ka mathe... Dipolelo tsena di habile ho fehla maikutlo a hodimo mme ke meritaoke...Le ha lekgotla le ananela puisano e matla, empa dipolelo tse jwalo di qetella di nkuwa e le tse sa thuseng ka letho le tseo sepheo sa sona e leng ho hlokoatsa. Boitshwaro bo jwalo bo tshwanelwa ke kotlo ya taelo ya ditjeo.”

Tatelano ya dintlha:

Mong. Montana o hlolehile ho fana ka dikgutliso tsa hae tsa lekgetho la lekeno tsa dilemo tsa hlahlobo tsa 2017, 2018 le 2019. SARS e ile ya qala ka oditi ya dilemo tsa hlahlobo tsa 2009 ho isa ho 2019.

Mong. Montana o ile a tsebiswa sena semmuo ka la 5 Pudungwana 2020. Ho latela tshebetso e tlwaelehleng ya molao, Mong. Montana jwalo ka molefalekgetho e mong le e mong o ile koptjwa ho fana ka lesedi bakeng sa oditi ena ho eso fete la 4 Tshitwe 2020.

Mong. Montana o ile a kopa ho ekeletswa nako mme SARS ya mo dumella hore a fane ka tsohle tse amehang le lesedi ka la 1 Hlakola 2021.

Mong. Montana o ile a hloleha ho fana ka ditokomane tse kopilweng. Sena ke tlolo ya molao.

Ka la Hlakola 2021, SARS e ile ya ntshetsa Mong. Montana tseko ya ho qetela ya hore a fane ka tse amehang mmoho le lesedi le hlokehang.

Le kgetlong lena hape Mong. Montana o ile a hloleha ho ikobela, e leng tlolo ya molao.

Oditi e ile ya phethelwa ka tlwaelo ya dinyewe tse tjena bakeng sa molefalekgetho ofe kapa ofe mme ditholwana tsa yona ya ba Lengolo la tse Fumanweng (“LOF”) le ngolletsweng Mong. Montana ka la 7 Phupu 2021.

Mong. Montana o ile a tsebiswa hore SARS e ikemiseditse ho teka dihlahlobo tsa lekgetho la lekeno tsa boleng bo ka bang R15,5 million mabapi le dilemo tsa hlahlobo tsa 2009 ho isa ho 2019. (Tjhelete feela).

SARS e fumane hore Mong. Montana o qobile sekoloto sa hae sa lekgetho ka ho se tsebahatse lekeno la hae le lokelang ho kgafiswa leo a le fumaneng dilemong tsena tse amehang tsa oditi. Sena ke tlolo ya molao.

Hape, ho latela tshebetso e tlwaelehileng ha molefalekgetho a le boemong bo jwalo, Mong. Montana o ile a fuwa nako ya matsatsi a 21 ho arebela tse fumanweng ke oditi.

Ka la 11 Phato 2021, Mong. Montana o ile a kopa mme a fuwa nako e ekeditsweng ho fihlela ka la 16 Phato 2021 ho arebala tse fumanweng.

Ka la 16 Phato 2021, Mong. Montana o ile a rabela ka tsela e sa fellang, mme a hloleha ho tobana le bohobo ba taba e fumanweng ke oditi.

Hona le ho sebedisa monyetla ona, Mong. Montana o ile a ikgethela ho hlasela SARS ka ho bua ditaba tse hlohang motheo kgahlano le SARS, ka ho e qosa ka hore "*diketso tsa yona di lonya*" le hore "*e letsholong la ho mo tsoma*".

SARS e hanane le dipolelo tsena, mme ya mo tsebisa hore e tla tswela pele ho phethela dihlahlobo tsena ho latela seo a faneng ka sona.

SARS e ile ya neha Mong. Montana tlaleho e mabapi le tswelopele ya taba ena ya hae ka la 11 Mphalane 2021.

Ka mora mona ho bile le diphapanyetsano pakeng tsa Mong. Montana le boramolao ba SARS.

Ka la 11 Mmesa 2022, SARS e ile ya neha Mong. Montana Lengolo la ho Qetela la Oditi, moo e neng e mo tsebisa hore SARS e ntshitse dipheko tsa dihlahlobo.

Mong. Montana o ile a hlalose tsa ka botlalo hore motheo wa hlahlobo eo ke ofe.

Ka nako ena, Mong. Montana o ne a se a hlahlobetswe lekgetho la tjhelete e ka bang R28 million (e akaretsang tjhelete ya dikotlo) e mabapi le dilemo tsa hlahlobo tsa 2009 ho isa ho 2019 ka lebaka la ho se tsebahatse lekeno lohle.

Mong. Montana o ile a tsebiswa hape hore ebang a sa kgotsofatswa kapa a sa dumellane le dihlahlobo, a ka kenya ngongoreho ya dihlahlobo tsena ho eso fete la 26 Motsheanong 2022. Sena ke se fuwang molefalekgetho ofe kapa ofe ya iphumanang a le boemong bona.

Motjha wa semmuso wa ngongoreho o ka hara karolo ya 104 ya Molao wa Taolo ya Lekgetho, o balwang mmoho le Molao wa 7.2 wa melao ya Lekgotla la Lekgetho. Ngongoreho e tlameha ho faelwa ho latela foromo ya ADR1 le ho kenngwa profaeleng ya molefalekgetho ya eFiling.

Ka la 27 Motsheanong 2022, Mong. Montana o ile a kopa mme a dumellwa katoloso ya ho kenya ngongoreho ya hae ho eso fete la 31 Motsheanong 2022.

Ka la 31 Motsheanong 2022, SARS e ile ya amohela “*ngongoreho e sa fellang*” ya Mong. Montana, moo hape a neng a bua ka dintho tse hlokanang motheo tse kgahlano le SARS.

Mothating ona, Mong. Montana o ne a se a hirile dioditara tse ntjha/baemedi ba batjha ba tsa lekgetho mme a ba a tswela pele ho kopa ho ekeletswa nako ya hore a kenye ngongoreho hape ka la 1 Phupu 2022. SARS e ile ya dumella kopo ena ya hae.

Ka la 1 Phupu 2022, Mong. Montana le/kapa baemedi ba hae ba batjha ha ba ka ba faela ngongoreho ho latela boitlamo ba bona. Hona le ho etsa seo, ba ile ba boela ba kopa katoloso e nngwe ya matsatsi a 30 hore ba tsebe ho arabela dihlahlobo/faela ngongoreho.

Ka la 11 Phupu 2022, SARS e ile ya hana kopo ena ya katoloso. Mong. Montana ha a ka a kopa phanyeho ya tefo bakeng sa sekoloto sa hae se hlahlobilweng sa lekgetho ho latela karolo ya 164(1) ya Molao wa Taolo ya Lekgetho. Sekoloto se morao sa lekgetho jwale se ne se lokela ho leshwa mme SARS e ile ya neha Mong. Montana tseko ya ho qetela ya ho lefa ka la 11 Phupu 2022. Mong. Montana o ile a hloleha ho lefa, SARS e ile ya tswela pele ho nka mehato ya ho boela e fumana seo e se kolotuwang e hlaloswang mona.

Ka la 22 Phupu 2022, SARS e ile ya fana ka dikhopi tsa diteitente tsa banka tsa Mong. Montana ho baemedi ba hae, ho latela kopo ya bona.

Ka la 20 Loetse 2022, Mong. Montana o ile a a fana ka lengolo le leng hape ho SARS ho hlalosa hape ka “*ngongoreho ya hae mabapi le oditi eo a buileng ka yona lengolong la 31 Motsheanong 2022*”. Hwa bohlokwa, lengolo le ne le ngotswe hore: “[re] hlokometse hore SARS e qetelletse e fumane kahlolo e sa phehiswang kgahlano le rona. Re boela re sebedisa tokelo ya rona ya ho arabela kahlolo ena e sa phehiswang e fumanwang ke SARS hang feela ha re qeta ho lekodisa kahlolo ena”. O itse o tla arabela taba ena “*tlasa sehlooho se seng se ka thoko*”. Nyehelo ena ya hae e ne e ntse e sa ikobele ditlhoko tsa ngongoreho ho latela dintlha tsa Molao wa Taolo ya Lekgetho, o balwang mmoho le melao ya Lekgotla la Lekgetho.

Ka la 23 loetse 2022, Mong. Montana o ile a boela a ngolla SARS lengolo le leng ho arebela kahlolo e sa phehiswang e dihlweng eo SARS e e fumaneg kgahlano le yena. Lengolong lena Mong. Montana hara tse ding o ile a rekota tse ileng tsa etsahala ka la 15 Loetse 2020 nakong eo SARS e neng e phethahatsa kahlolo ena e sa phehiswang e dihlweng kgahlano le yena. Lengolo le ne le fupere tsena:

“*Ho bonahala hore, SARS e fumane Kahlolo e sa Phehiswang ya Lekgotla e kgahlano le nna Lekgotleng le Phahameng la Afrika Borwa (Karolo ya Gauteng, Pretoria) bakeng sa bokaalo ba paloyohle ya R44,927,320.23. Ke ne ke se lapeng ka nako eo lelapa la ka le neng le phenyokollwa mme ke ne ke sa tsebe ka ketso ya Lekgotla e neng e ntibile ho tswa ho SARS. Ha ho disamane tseo ke ileng ka di fuman mabapi le sena.*”

Lengolo le tswetse pele ho bolela hore o ile a eletswa hore kahlolo ena e sa phehiswang e ile ya fumwana ka tsela e nang le thetso Lekgotleng le Phahameng mme ha e kgone ho ka hlakolwa. Ntlha ya hore Mong. Montana kamora nako ena yohle ha a so etse kopo e lebang Lekgotleng le Phahameng ya hore kahlolo ena e hlakolwe ke ya bohlokwa ruri. Jwale ha a sa kgona ho etsa jwalo.

Ka la 30 Pudungwana 2022, boramolao ba SARS b ile ba ntsha lengolo le tsebisang Mong. Montana hore ngongoreho eo ya hae e hloka mooko mme ha ya ananelwa. Mong. Montana o ile a fuwa ho fihlela la 31 Pherekong 2023 ho fana ka ngongoreho e utlwahalang. Dipuo tsa Mong. Montana tse mabapi le kahlolo e sa phehiswang le tsona di ile tsa arabelwa lengolong lena mme ha hananwa le tsona. Boramolao ba SARS ba ile ba hlalosa lengolong motjha wa nnete o ileng wa latelwa ke SARS ho ya ka Molao wa Taolo ya Lekgetho ho fumana kahlolo e sa phehiswang kgahlano le yena.

Ka la 22 Tshitwe 2022, Mong. Montana o ile a tsebisa SARS ha a ikemisetsa ho faela ngongoreho efe kapa efe e nepahetseng mme a ngangella ho bua seo a ileng a se bua pejana. Ho ya ka yena, o nkile hore nyehelo ya hae ya la 20 Loetse 2022 e lekane.

Ka la 23 Pherekong 2023, SARS e ile ya raba Mong. Montana mme ya mo tsebisa hore ha ho sa na menyetla e meng hape ya ho kenya dingongoreho tse morao.

Mong. Montana, ho tloha ka nako eo, ha a so faele ngongoreho e utlwahalang.

Ho latela dintlha tsa karolo ya 100 ya Molao wa Taolo ya Lekgetho, dihlahlobo ts tlatsetso jwale e se e le tsa makgaolakgang mme ha di sa buletswe kganyetsano.

Taba ya Mong. Montana e reng yena ke hona jwale moo a hlokomelang bokaalo ba sekoloto sa hae sa lekgetho ke leshano le ho hloka botshepehi.

Motjha wa pokello ya lekgetho o ileng wa latelwa:

Molao wa Tsamaiso ya Lekgetho o jarisa SARS boikarabelo ba molao ho nnetefatsa pokello e sebetsang ka ho phethahala ya lekgetho.

Pele oditi ena eo ho buuwang ka yona ka hodimo mona e qala, Mong. Montana o ne a se ntse a na le sekoloto se morao se hlahlobilweng sa lekgetho sa selemo sa hlahlobo sa 2015. Sena ke ho latela hlahlobo eo SARS e entseng ka la 1 Phupu 2017. Ka la Mphalane 2019, tjhelete e kolotuwang ya lekgetho e ne e se e fihla ho R1,800,762.38. Ereka bokaalo bona bo ile ba sala bo le jwalo, SARS ka la 2 Mphalane 2019 e ile ya faela seteitemente ho latela dintlha tsa karolo ya 172 ya Molao wa Taolo ya Lekgetho, le Morejisetara wa Lekgotla le Phahameng la Afrika Borwa (Karolo ya Gauteng, Pretoria) tlasa nyewe ya nomoro ya 72501/19 (*“the Registrar”, “the High Court” and “the 2019 certified statement/tax judgment”* respectively) ho latela kamoo Molao wa Taolo ya Lekgetho o hlokanang kateng.

Ho latela dintlha tsa karolo ya 174 ya Molao wa Taolo ya Lekgetho, e bolela hore seteitemente se jwalo se nnetefaditsweng se tlameha ho nkuwa e le kahlolo ya setjhaba ebang e ntshitswe ke Lekgotla le Phahameng molemong wa SARS bakeng sa bokaalo bo boletsweng seteimenteng seo.

Ke molao hore seteitemente se jwalo se nnetefaditsweng sa sekoloto sa lekgetho se kentsweng ke SARS ho Morejisetara kapa Tlelereke ya lekgotla le nang le matla a jwalo, sona se tshwana feela le kahlolo ya setjhaba.

Ka la 11 Mmesa 2022, SARS e ile ya phethela dihlahlobo kgahlano le Mong. Montana ya boletsweng ka hodimo mona, le moo ditseko tsa makgaolakgang di ileng tsa ntshuwa ka la 28 Phuptjane 2022 le ka la 11 Phupu 2022.

Erekaha Mong. Montana a sa ka a lefa sekoloto se hlahlobilweng sa lekgetho, ho ile ha boelwa ha faelwa seteitemente se nnetefaditsweng seng hape mme se lokisitswe ho latela karolo ya 172 le Morejisetara wa Lekgotla le Phahameng ka la 11 Phato 2022. Sena se ne se kentse paloyohle ya sekoloto sa lekgetho la kgale le se la lekgetho le letjha (*"seteitemente/kahlolo e nnetefaditsweng ya 2022"*). SARS e dumelletswa ho etsa sena ho latela dintlha tsa karolo ya 175 ya Molao wa Taolo ya Lekgetho. Bokaalo ba kahlolo ho latela dintlha tsa diteitemente/kahlolo e nnetefaditsweng ya 2022 e ne e le R44,927,320. Tswala e ntse e tswela pele ho hola hodima bokaalo bona.

Morejisetara o ile ntsha mangolo a ho phethahatsa sena ka ho fapana ka la 29 Mphalane 2019 (ho latela diteitemente/kahlolo e nnetefaditsweng ya 2019) le ka la 15 Phato 2022 (diteitemente/kahlolo e nnetefaditsweng ya 2022"), hore di phethahatswe jwalo ka karolo ya pokello e tlwaelehileng ya sekoloto ho latela ka moo sena se amang molefalekgetho ofe kapa ofe.

Ka lebaka la diaterese tsa bodulo tse ngata tseo Mong. Montana a faneng ka tsona, Sherifi o ile a ntsha mangolo ka la 20 Pudungwana 2019, 22 Pudungwana 2019, 25 Pudungwana 2019, 15 Pherekong 2020, and 15 Loetse 2022 ka ho fapana, le diatereseng tse fapaneng.

Mong. Montana o bile teng atereseng e nngwe nakong eo lengolo le neng le fihliswa ho yena ka la 15 Pherekong 2022.

Ka lebaka la hore Montana a sa lefe dikoloto tsa hae tsa lekgetho, le ho latela ho kgotsofatswa ha dintlha tsa Molao o mabapi le ho Tjhona wa 24 wa 1936 (*"Molao wa Tjhono"*), SARS e kentse kopo ya kgapo e molaong ya thepa ya lefa la Mong. Montana ka la 22 Motsheanong 2023.

Kopo ena e ne e itshetlehlile hodima sekoloto sa lekgetho se morao sa Mong. Montana, se ntse se soka se leshwa.

Dipuo tsa Mong. Montana tse reng SARS "*e fetotse kahlolo ya lekgotla ka mokunyata ho tshhehetsa dikoloto tse hodimo tsa lekgetho*" ke leshano.

Dikhopi tsa diteitementse tse nnetefaditsweng di se di filwe Mong. Montana makgetlo a mangata a fapaneng. Di boela di hoketswe mona e le dihlomathiso tsa kopo ya SARS ya kgapo e molaong ya thepa ya Mong. Montana.

Kopo ya SARS e hlakisa tsena ka tsela e hlakileng:

“Ka la 2 Mphalane 2019, SARS e ile ya faela seteitemente le Morejisetara wa Lekgotla le Phahameng...Ho latela dintlha tsa karolo ya 174 ya Molao wa Taolo ya Lekgetho, seteitemente sena se na le tshusumetso hodima kahlolo ya setjhaba e bileng molemong wa SARS Lekgotleng lena mabapi le bokaalo boo ho buuwang ka bona... “Ka la 11 Phato 2022, SARS e ile ya faela seteitemente le Morejisetara wa Lekgotla le Phahameng...Ho latela dintlha tsa karolo ya 174 ya Molao wa Taolo ya Lekgetho, seteitemente sena se na le tshusumetso hodima kahlolo ya setjhaba e ntshitsweng ke ke lekgotla lena kgahlano le molefalekgetho...”

Lekgotla le Phahameng ha nako e ntse e ya le tla mamela kopo e mabapi le kgapo e molaong ya thepa.

Maiteko a ho fana ka kopo ena ya kgapo e molaong ya thepa diatereseng tse fapaneng tsa Mong. Montana, ha a so atlehe.

Kahoo SARS ha e na boikgethelo bo bong ntle le ho kenya kopo Lekgotleng le Phahameng ho fumana tumello ya Lekgotla ho mo neha kopo ena ka tsela ya aterese ya hae ya imeile le ka ho phatlalatsa tsebiso ena ya maikemisetso a sena lesedinyaneng la lehae.

Nakong e ka bang selemo, e leng ya la 5 Phuptjane 2024, tlasa boemo boo Mong. Montana a sokang a faela afidafiti ya hae e arabelang kopo ena ya kgapo e molaong ya thepa, Mong. Montana o ile a kenya kopo ya hore a tshwarelwe mabapi le ho faela afidafiti ya hae e arabang sena ka morao ho nako.

SARS e ile ya hanana le kopo ena ya tshwarelo mme Mong. Montana a tlisa afidafiti e arabelang. Afidafiting e arabelang, Mong. Montana o ile a boela a pheta dipolelo tse hlokanang motheo le tse hlokanang molemo mabapi le SARS.

Ka la 14 Phato 2024, SARS e ile ya kenya kopo ya ho behella ka thoko dipolelo tsa Mong. Montana tse neng di le ka hara afidafiti ena e arabang.

Ka la 21 Phupu 2025, Lekgotla le Phahameng le iel la qhelela ka thoko kopo ena ya Mong. Montana e neng e kopa tshwarelo ebile e mo laela ho lefa ditjeo tsa nyewe ena.

Lekgotla le boetse la dumela kopo ya SARS ya ho qhelela ka thoko dikahare tsa afidafiti ya Mong. Montana tse neng di hloka motheo le tse neng di batla ho fehla maikutlo feela.

Mong. Montana o entse kopo ya ho ipiletsa kgahlano le kahlolo ena. Kopo ena e tla mamelwa haufinyane.

Haufinyane tjena, ka la 8 Phato 2025, Mong. Montana o ile a atomela SARS ka hore ho be le tjhebisano, moo a ileng a hlahisa hore a mpe a lefe tjhelete e kana ka R 5.4 million ho lefa sekoloto sohle sa hae sa lekgetho le morao seo ha jwale se emeng ho R55,133,282.94.

Se lokelang ho etsahala pele ho ya ka dintlha tsa Molao wa Taolo ya Lekgetho hore SARS e kene ditaba tse mabapi le tjhebisano, ke hore sekoloto sa lekgetho e se be taba eo ho ntseng hanyetsanwa ka yona. Ka mantswe a mang, molefalekgetho o tlameha ho dumela hore ho na le lekgetho le teng le le lokelang ho leshwa.

Ka la 30 Loetse 2025, SARS e ile ya arabela boramolao ba Mong. Montana, e kopa Mong. Montana ho hlalosa ditlhoko tsa molao le tsa semmuso tsa tjhebisano e jwalo.

Lesedi lena le kopilweng le lebelletswe ka la 14 Mphalane 2025.

Kahoo ha ho amohеле hore Mong. Montana a hlasele SARS le bahlanka ba yona phatlalatsa tjena, ha ka lehlakoreng le leng a ntse a batlana le tsela ya ho fumana tjhebisano ya sekoloto sa lekgetho seo a se ananelang.

Ho itshetlehilwe hodima motjha wa tjhebisano o qadilweng ke Mong. Montana le ditholwana tsa seo, SARS e ikemiseditse hore kopo ya kgapo e molaong ya thepa e tle e mamelwe ke Lekgotla le Phahameng.

Ho fihlela jwale, Mong. Montana ha a so faele afidafiti ya hae e arabelang kopo ya kgapo e molaong ya thepa. SARS e boletse ntlhakemo ya yona kgahlano le yena mme sena se dutse se sa phephetswa.

Hwa bohlokwa, diketso ts SARS kgahlano le Mong. Montana haesale taba ena e qala, di tla tswela pele ho ba tlasa leihlo le ntjhotjho la molao.

SARS e ikemiseditse ho ikamahanya le molao le ho nnetefatsa hore balefalekgetho bohle ba tshwarwa ka tsela e lekalekanang.

Ho fihlella sena, Khomishenara wa SARS o tsebisitse Khomishenara wa SAPS le Molaodi wa naha wa Botjhotjhisi ba Setjhaba hore yena, mmoho le bahlanka ba bang ba SARS bao e leng karolo ya phethahatso ya molao wa lekgetho tabeng e amang Mong. Montana (mmoho le molefalekgetho ofe kapa ofe), ba tla sebetsa mmoho le ka botlalo ebang ho ka ba le diphuputso tse ka bang teng ho latela ditletlebo tsa Mong. Montana. Hodima moo, SARS e kopile SAPS ho shebana le tshebediso e mpe ya mehlodi mmoho le metjha ya ditletlebo ka batho ba batlang ho lahlehisa le ho baka lerata le sa hlokahaleng.

Maikemisetso ka puo ena ya setjhaba ha se ho sitisa diphuputso dife kapa dife tse ka bang teng tseo SAPS kapa NPA e ka di lekolang moelelong ona, mme sepheo se le seng ka yona ke ho sireletsa SARS le bahlanka ba yona ho ya ka moo molao o dumelang kateng.

Khomishenara ya SARS o na le maikutlo a hore dipuo tsena tsa Mong. Montana tse entsweng setjhabeng tse kgahlano le SARS di ka lematsa setheo sena sa bohlokwa sa

Mmuso, seo motheo wa sona e leng ho thusa demokrasi ya naha ya rona le ho shebana le diphephetso tsa phedisano le ikonomi.

SARS e ipiletsa setjhabeng hore se be sedi le ho netefatsa lesedi ka ho ikopanya le bahlanka ba SARS dikanaleng tsa semmuso tsa SARS, le ho qoba ho fafatsa dipuo tse hlokanang motheo setjhabeng.

SARS e na le tokelo ya ho hlalosa ha batsi kapa hona ho tlatsetsa bophatlalatsi bona ba setjhaba ebang ho hlokeha, mme sena se ka akaretsa ho phatlalatsa direkoto le ditokomane dife kapa dife, moo sena se loketseng.

Bo ntshitswe ke: Ditshebeletso tsa Lekgetho tsa Afrika Borwa (SARS)

- [Sehlomathiso 1 – Bophatlalatsi ba Setjhaba: Se nkuwang se builwe ke Mong. L Montana SP \(Setho sa Palamente\) ho latela tlaleho ya lesedinyana la Independent Newspapers la 7 Mphalane 2025](#)
- <https://www.sars.gov.za/issued-notice-of-motion-and-founding-affidavit-lt-montana/>
- <https://www.sars.gov.za/montana-v-sars-judgment-12/>
- <https://www.sars.gov.za/issued-sequestration-application-of-lt-montana-annexures/>

Ho fumana lesedi le fetang lena, ka kopo ikopanye le SARSMedia@sars.gov.za